

35083

文 291.3631
43

中国国家图书馆

登录号 线 00839

一 函 一 册

中国国家图书馆

璞盧詩草

師曾題



中華民國十年
京師文楷齋刊

吳汪東寶旭初從余學亦好爲詩民國十年
秋以其兄之子重英詩來蓋學古而見情性
者也婦人詩率能爲綺靡不能爲樸雅重英
好陶靖節詩所作贈兄七哀諸篇彬彬乎質
有其文焉雖文通所擬子瞻所和未能過之
也七言近體猶有閨中隱約之聲要本之中
誠者不能易也重英適何氏年二十六卒秀
而不實其家內外皆哀之昔之賢媛擅文學

致老壽如班昭者慮不過一二人重英雖中
夭觀其襟度近代士大夫所不能擬其遺澤
之存于世者亦可以爲化也才難不其然乎

章炳麟記

從姪華熙適丹徒何墨基年而殂兩家嫺黨
靡不悼惜所遺丹青數幀詩若干首共謀刊
印俾行於世華熙生而敏給長而淑嫺順事
尊章相夫專壹蓋其備於婦德維古實難假
令齊大家之壽處女師之位足以垂範壺內
有光彤管如何不弔天奪其年芬芳在躬鬱
而未嘗以文菽傳非其志也抑所以傳之者
厘此即生者之心滋可哀已華熙嘗從余學

詩憲讀漢人樂府及建安以來五言尤嗜陶
詩丹鉛狼籍其所自爲亦能髣髴七言近體
規模唐人然非其至者方今承學之士務爲
新異詖辭衰說披昌一世詞章雖小道能循
涂而知歸者蓋鮮及放者爲之或且剝絕成
言自矜新體巴人之曲和者萬人文學衰微
至斯而極觀華熙所爲詩清妍安雅雖不必
陵轢齊梁方駕徐蔡儻亦庶幾所謂遠于鄙

倍者矣民國十年辛酉十一月汪東敘

中国国家图书馆

姊氏重英少承慈訓常誦昔人詩歌以爲陶冶心性之用沉浸既久因而工之每取漢魏以來至于唐宋之詩深究其短長之由用自砥礪其所爲詩神超象表意與境深清挺渾雅而不拘拘于細節昔人謂陶淵明之詩獨能無意于世俗之毀譽姊氏近焉乃不幸中道摧亡遺詩甚寡悲夫雖然命短固何損其才詩少適足增其貴謹理其稿得詩凡七十

有七章俾付手民豈惟永誌哀慕亦將爲求
賞音于千秋云爾胞妹復熙謹序

題重英姪女璞廬遺稿

楫寶

掩淚不成讀叢殘一卷詩
聰明寧汝誤懷抱
竟誰知逸響能嗣雅
工吟不騁奇詞人久寥
落況復在蛾眉

猶憶垂髫日殷勤問字來
天胡靳以福人共
惜斯才深造應何限
天真可哀筆牀與硯
匣空自付塵埃

中国国家图书馆

璞廬詩草



吳縣汪華熙著

春雨

濛濛春雨野花開
詩句吟成未待催
日暮東風吹過處
如珠點點落新苔

聞鴈

繡閣垂簾試奕棋
宵深露冷未曾知
雲邊征鴈聲聲唳
似道秋光已半衰

思鄉

月白風清夜色涼
蕭條景物葉初黃
雲邊一鴈哀鳴過
萬里悲秋客望鄉

秋夜

玉露涓涓冷梧桐
葉半黃吟深忘漏永
坐靜覺花香皓月
秋霄潔金風夜氣涼
故園丹桂發遙憶
一庭芳

早雪

菊老秋光盡燕山雪最先曉窗添曙色重幕
約鑪煙淺醉渾忘冷高吟不計篇寒雲懷故
土鄉信付鴻傳

夜過禁城

翠栢鬱青葱新宮即故宮徒傷人事改復感
歲華窮英傑乘時起興亡自古同淒涼今夜
月猶照禁城東

供梅

北風飛蠟雪冷蕊獨參差疏影詩同秀寒香
春未知相依人靜後最好月明時小閣塵氛
遠清芬滿硯池

蠟梅

暮雪紛紛滿曲闌幾枝蠟蕊勝春蘭疏香冷
艷清無限也共梅花傲歲寒

嘲蝶

春到梨花已欲迷百花深處更飛低不愁無

計留春住卻看殘紅落井泥

山居

荒村車馬絕
茆舍隱橋西
泉韻鳴幽澗
烟光鎖綠畦
偶然携紙筆
隨意畫山溪
有客尋高躅
層巒翠欲迷

喜雨

晴多轉望雨
向晚忽瀟瀟
砌下苔生綠
牆東柳展條
煙添書幌靜
雲障碧天遙
百慮如新

洗忘機酒一瓢

北海荷花

昆明湖水自悠悠鳳蓋龍舟一夢秋底事荷
花開獨盛清香借問爲誰留

秋夜

雨霽秋雲薄清宵月倍明西風初薦爽時序
又新更世亂悲工部途窮哭步兵連年四海
內未絕鼓鼙聲

夜景憐清爽滿牀月照臨不愁銀燭暗喜聽
草蟲吟霜氣摧殘葉西風急暮碁年華如逝
水詩思共秋深

長安

浮雲蔽日晝迷茫處處笙歌醉玉觴富貴當
年誇許史功勳舊業半金張紅樓春到珠簾
卷舞館風生蜀錦香瓦釜雷鳴蟬翼重濯纓
誰復憶滄浪

上巳

三月皇州淑景多踏青人唱踏青歌芳郊雨
過舒新柳小院春來暖綠莎詞客酣開上巳
宴羽觴爭泛曲江波高車駟馬塵連野嫋嫋
東風拂綺羅

陸文端公故宅

甲第峩峩雨露邊祇餘舊燕到堂前園亭草
長迷芳徑桃李花開屬暝煙亂世易增千歲

感令名不待異時傳衣冠故國留孱主空仰
喬松晚節堅

寄伏生大兄

未涼天氣送征騑轉瞬東籬菊半稀秋水已
添帆影穩江楓紅處看君歸

槐堂召飲有懷姑氏

槐陰幽閣靜秀色鬱龍葱悽惻懷姑氏低徊
想舊容一棺從寺遠殘稿久塵封良夕開嘉

宴悲來向酒慵

詠史

咸陽宮闕弔秋風身死還嗟帝業空海上神
仙不可接蓬萊猶隔白雲中

中央公園

晴映長衢走雪驄名園春宴及今同明璫翠
鈿皆仙侶玉宇瓊樓豈月宮日暮猶聞鶯宛
轉星闌稍覺露滋融群芳未解遊人妒枝葉

亭亭滿院紅

過徐州

燕臺回首暮雲浮無限青山起客愁芳草萋
萋平野綠江南春色到徐州

金陵道中

頻年南北逐飛蓬今古興亡感慨中往事不
堪問耆舊顏垣何處認遺宮鐘山斜日聽啼
鳩淮水晴波映晚虹斷石荒碑春色暗白楊

寂寞向東風

空林露氣未全晞
曙色蒼茫接翠微
清磬悠悠報清曉
征塵細細滿征衣
臨風鷺浴春江暖
背郭牛眠野草肥
極目臺城花爛漫
迢迢鄉路燕同歸

代邊戍

雉堞雕城百尺危
胡天月色動旌旗
平沙漠漠音塵絕
秋塞蕭蕭鴈影稀
千里關河回白日

首十年鄉淚濕戎衣
笳聲夜夜催人老
醉卧沙場壯志違

雨霽遊拙政園

桐槐蒼翠雨初收
景物娟娟晚更幽
水漲荷池四五尺
波平欲上採蓮舟

同兄妹北園散步

近郭桑麻盛秧歌
爽更清雨餘溪水綠
風細柳絲輕
村笛吹牛背
林鴉噪晚晴
來遊同得

句歸路石橋橫

季夏雨夜

暑氣漸消歇涼秋已可期更闌夢乍覺窗響
雨微吹蛩笛傳清夜蛙聲動碧池靜中生好
景覓紙一題詩

北園

野曠愜幽情平林暮色橫酒旗迎醉客蘭葉
發春城柳渚堪垂釣中原又甲兵滄浪歌未

罷萍末晚風清

尺書

消息異千里魂驚夢未安
黃旗龍復見平海水重瀾
此夕京華思無邊月色寒
危樓空佇立迢遞尺書難

秋泛

鼓枻聞漁唱溪流四郭通
雲蒸青嶂濕水染落花紅
野渡蒹葭外扁舟煙雨中
殘荷浮前

浦冉冉送香風

長門怨

永巷秋偏早涼宵玉露生那堪愁裏聽黃葉
落階聲

題畫

常愛驚人筆松山萬壑深秋風來几席直欲
作龍吟

秋日至拙政園

落木蕭蕭露欲霜
寒蟬寂寞雁初翔
數叢翠竹連層閣
一片黃花對夕陽
勝地來尋曾到
徑芳塵還滿
舊登堂低徊往事猶堪憶
幾度西風起晚涼

春郊

常畏寒多簾久垂
春光深淺未曾知
芳郊乘興東風暖
薺麥青青又一時

有作

雨濕胭脂桃李新
朱闌間倚翠眉顰
愁心慵道春光好
祇覺鶯啼惱殺人

送別大兄之潤州

飄然行客試春衫
鳥語花紅處處山
此去金焦堪駐屐
莫因離思動愁顏

荅伏生大兄

別君蘭蕙芳會此
蟋蟀鳴皎皎新月
弦嫋嫋秋風清團
圉骨肉親慰此遠
離情京口美山

川結屋依高堦俯攬羣山色遠聽大江聲躬
耕脫塵網逍遙羨令兄山松何鬱鬱江鳥翻
飛輕悟此自然理益當薄虛名素心孰儔匹
湛湛秋水澄歸來惠佳章譽我爲獨醒感君
相勗意不負此平生

書感

寂寂春光徑滿苔幽齋寥落長微埃書封蛛
網誰相近窗集蜂窩局不開欲暫棲依聊拂

拭爲耽吟咏儘徘徊揣摩萬卷平生願常恐
蕭蕭白髮催

楊柳枝詞

東風嫋嫋拂長條似與遊人鬥舞腰爲愛纖
纖作細步共拋蘭棹寄春潮

明眸皓齒綠鬟低細步纖纖碧草萋無限芳
情滿楊柳陌頭千樹子規啼

紅闌橋畔小亭傍金線毵毵拂水長波細風

輕春晚晚美人竝立看鴛鴦

鶯囀柔枝在館門欲留春色到黃昏吳姬休
唱渭城曲遊子思鄉恐斷魂

贈大兄

春風吹庭樹灼灼桃李芳因風懷南畝宿麥
應已長茆舍毗疇隴松竹森前岡地僻罕行
迹恬然俗慮忘田薄但勤耕歲晚且餘糧有
酒招農鄰歡洽每傾觴富貴如浮雲守拙誠

爲良何用慕鴻鵠一舉千里翔千里豈不遠
網羅已高張

夏夜

碧天如水月華臨冰簟夢迴玉漏沉窗外蟲
聲聽不得未秋已作斷腸吟

懷庾妹

月朗斗星稀涼風拂暑衣樓頭人獨倚雲外
鴈雙飛畫筆常超俗詩思總入微知音宇內

少未忍片時違

南塘即事

曉景澄清宿霧收
百花州外蕩輕舟
雲連山色環芳野
烟冑楊枝俯碧流
帶露荷香波灩灩
乘風帆影路悠悠
漫疑香火南塘盛
可是紅塵佛尙留

南塘在葑門外產菱藕五六月間荷花獨盛時莠民有假活佛

之名以愚眾者遠近爭往參禮香火不絕

過寒山寺

古木參差曲徑深
梵鐘非復舊時音
尋幽躑躅山前路
悵望江天日又沉

偶感

江山搖落易驚秋
寄世浮生類白鷗
絕塞時聞徵宛馬
名都日見起朱樓
琱戈鐵騎征人怨
楚雨湘雲碧草愁
玉樹宮中憔悴甚
鷓鴣休向上林投

寄大兄

嫋嫋秋風發落葉散縱橫感時起愁思念子
獨遠行遠遊京口間開荒冀晚成荆扉面新
圃荒徑耀秋英陟岡睇流景夕照湛虛明素
心超物外塵想不復縈緬然獨謠歌奈何寡
和聲徘徊日將暝慷慨不能平達人無芥蒂
願終樂吾生

送兄妹後對月作

迢遞山川道路紆弟兄別淚各盈襦清光照

影分三地一片相思照得無

荅大兄

煙水江村別有天終朝尋興在林泉卻將疎
懶羨君甚獨作桃源洞內仙

懷庚妹

寂寞蕭齋冷吟成祇獨評養生惟學道避患
恥求名思苦詩翻拙更闌酒罷傾懷君不能
寐坐待月華明

送別秋歸候閒居意寡歡論文思宿昔開緘
得平安迢遞山川隔蹉跎歲月闌朔風吹黃
浦應覺暮潮寒

寄妹

并序

雨雪飄搖薄寒中人離群多感幽獨無聊
慨日月之易遷惜人生之多別緣成短章
寄懷于言

孟冬寒風起雨雪紛然來淒淒歲將暮日月

苦相催索居不爲歡鬱紆念所親所親在何
許乃在東海濱時復以詩至慇懃寄相思相
思無時已相見在何時願得與所親終老不
相離

荅庚妹

雙鯉迢迢至相思寄彩箋原知暫作別非是
故纏綿來歲逢春暖期君指月圓殷勤話珍
重珍重雪霜天

至日寄大兄

小閣寒生四壁風景長日短寂寥中年光荏
苒看冬盡塵事夤緣與俗同力學始知求志
一不才莫更怨時窮松醪薄醉消嚴冷臘雪
窗前壓翠叢

上海別庚妹

臨歧揮手復遲遲長短吟成別後思忍淚相
看各無語牽愁楊柳又如絲

行行回首華亭遠煙水蒼茫認舊途多少離
情訴未盡匆匆落日已姑蘇

荅妹

漫漫道路長別已會何時和風豁素襟促晷
多悲思春禽吐新音園柳展柔枝麗景雖可
悅懷遠忽不怡端居方戚戚嘉章遙相遺情
深致繾綣感愧涕漣沔援筆荅殷勤懇切無
飾辭

靈巖懷古

迢遞靈巖山木蒼登臨懷古獨茫茫參差禾黍荒歌榭縹緲煙霞鎖洞房壯士美人俱寂寞桑田滄海一悲涼館娃宮徑迷芳草花落鶯啼又夕陽

讀史有感

風流文彩數諸家坎壈終身萬古嗟材大常爲造物忌蒼天何必予才華

小病初起戲成疊字詩寄兄妹

溟溟連日忘朝夕忽忽窮愁百事闌驚夢瀟
瀟愁夜雨侵帷峭峭怯春寒難明窮達茫茫
感欲辨薰蕕黯黯嘆雁序相違易悵悵華亭
江北雨漫漫

讀八叔父寄懷象山父老詩

藉藉賢聲千里馳弦歌重憶武城時扁舟去
郡書同載一歲爲官政已施曾植櫻桃垂蔭

遠更貽詩句繫人思象山父老情無限回首
春風問後期

寄大兄

苦旱聲傳江北來江南遙憶費疑猜雙魚問
取真消息莫又遲遲放鯉回

春水

已嘆長流逝不回更堪風雨百花摧紅英悵
逐清波遠翠荇遙牽細浪來十里溪橋烟縹

縹雨行楊柳燕低徊湖山春色憐將盡桂棹
何時錦纜開

積雨

積雨泥官道行人出入咨花殘蜂失意食罄
鳥啼飢綠野空肥草虛堂未罷棋陰霾長日
晦開霽復何期

奉寄 諸父

文章道德冠當時奔走風塵日月馳竟使蓬

蒿荒故徑爲求升斗去天涯迢迢應憶鱸魚
美短短空嗟鬢髮衰未識何年同解組竹林
杖履許追隨

七哀

寒暑忽易時經緯失其常千鈞不爲重瓦釜
鳴高堂黑白久淆亂顛倒著衣裳大道固常
在群生儔能詳昧然死其心豈復知憂皇哀
哉明達士感此五內傷

徘徊東西衢荆棘忽已徧靡靡懷故道憂思
不可見白石倏西暉咄咄風雲變吁嗟初生
民逢此復何眷世事日糾紛黃金亦云賤誰
能解倒懸伊周難再見乘桴浮滄海滄海一
時填俛仰獨躊躇推愴心如剗

人生感朝露老若三秋樹嚴霜下中林飄搖
委荒路丸丸松與栢千歲常如故願言如松
柏惟年永以固

懷兄妹

無聊轉覺此身閒
相憶愁含尺素間
百歲匆匆人易老
半爲離別損朱顏

有感

於今才氣寄東流
獨醒惟應作楚囚
千里山川違舊侶
一春花鳥亂鄉愁
北來荊棘迎車轍
南望雲波少客舟
別淚驚看雙袖濕
無聊長覺歲悠悠

倚闌

漏下迢迢已二更
稀星明滅玉河橫
景風吹處浮雲散
皓月圓時夜氣清
光滿遙應驚宿鷺
律調何處響新箏
倚闌微覺涼侵袖
人靜宵深露漸生

寄庾妹

銀牀冰簟怯新秋
明月窺人兩地愁
坐賞清輝思往歲
幾回魂夢赴江樓

重陽日喜新銘夫人見過

秋到重陽日菊花燦已黃蹉跎忘歲月惆悵
憶家鄉情重君能至交深意倍長何時復來
過莫待北風涼

陳氏七姑母輓詩

人生易離別離別未須臾自謂各年少別去
莫嘻吁何意一旦間良會永難圖今茲判幽
冥悲淚沾衣襦分爲姑與姪親密無參差姑

昔在室時便言多令儀謝家十二年婦德復
無虧心悲委諸雛索母日夜癡靈幃起悲風
屏几流塵集大暮不可晨魂魄焉能接欲臨
奠一觴路遠無由及山川脩且長風雨淒以
急南望徒踟躕旦夕空掩泣

存句

間眺登樓忘日暮夕陽斜照滿山紅
逸思清才孰與論新詩吟出欲驚人

塞寒驚雁陣淡月自逍遙

細細風鈴語娟娟月魄生

春夜

壯志隨流水愁心託釣磯

詠史

中国国家图书馆



中国国家图书馆

中国国家图书馆

中国国家图书馆

中国国家图书馆